

求恕齋
叢書

雪橋詩話三集

九

120
44

雪橋詩話三集卷第九

遼陽楊鍾義撰集

吳興劉承幹參校

孫子瀟奉 睿皇帝遺詔成服哭臨恭輓四首之二云
龍旂象輦駐天遊忽報宮車晏帝邱八駿自修巡狩典
九疑偏遇陟方秋東園祕器星馳驛南殿容衣月掩幃
作冊未須揚末命平時金鎖早綢繆珠囊金鏡闕宸居
睿草從容盱食餘盡掃黃巾清海甸親沈白馬奠河渠
年豐屢下蠲優詔刑措還傳肆書累德南郊天意定
謾憑珪黯議丹除 純皇帝之初生也宮監相傳有誕

降在熱河之說劉金門纂修實錄定爲誕降在雍和宮以御製詩爲證 仁宗升遐大臣撰遺詔沿舊說之譌後知其誤至追改詔書子瀟詠史云堯母門開帝錫名猗蘭宮殿事分明黃龍捧日臨金闕紫鳳翔雲護玉京惹苒球應生內苑菖蒲花豈發邊城洛陽三日奇香滿浪認齊州夾馬營實紀其事所云文章五色降鸞臺薄譴俄驚覆餗災暫奪樞機離要地尙留鼎軸近中台謂托文定及大庾相國也

仁宗序味餘書屋集謂乙酉年入學從覺羅奉碩亭先生讀書至于辰年五經麤畢從謝東野先生學今體詩

丙申年從朱石君先生學古文併古體詩甲辰年恭和
御製遊龍井詩中泉雷忽疑雨竹春不知秋十字 高
宗丹毫改定云錢坤一宗伯充上書房師傅時寄家書
云諸位阿哥皆每日走三四里然後至書房讀書下午
讀完書又走三四里然後回家若冬天有走六七里者
皇子皇孫皆大半如是蓋我 帝皇之家讀書皆如是
一則習勞一則聚在一處心力易於定而他務及外務
均不得而使之近此 天家之善教也

嘉慶甲子幸翰林院自 純廟臨幸後閱六十年無復
舊臣祇餘院中老隸年登八十曾觀盛儀 御座設後

堂南向劇臺在敬一門外開院署東西夾道爲左右兩翼入宴進路皆由此隸傳述屆期 仁宗詣文廟行禮至清祕堂少坐諸臣各歸坐次隨奏請陞座入宴至座前進酒畢蒙賜酒復位又召至御案前賜酒承應演十八學士登瀛洲故事以東方朔爲翰林前輩乾隆九年尙有上官昭容選詩一劇自現任翰詹及曾任編檢諸臣凡百七十餘人外儀親王成親王慶郡王定親王特命與宴兵部尙書長齡曾任掌院學士太常寺卿趙秉冲主事黃鉞在南書房行走俱一體與宴黃鉞旋改贊善龔文恭禮成恭紀詩一曲清平奏舜絃笙歌隊裏進吟箋柏梁特許聯

吟徧又喜簪毫到御前是日御製用唐張說東壁圖書
府五律首末二字爲韻餘字以三十八人分賦其分韻
所不及者別爲柏梁體一篇亦依乾隆故事也

喀喇沙爾東百八十里烏沙克塔拉軍台路旁有大玉
三大者重萬觔青色次者重八千觔葱白色小者重三
千觔白色置於地乾隆季年運自葉爾羌西役人畜挽
曳率以千計將以入貢嘉慶四年二月奉旨截留毋庸
呈進回漢歡呼兵民額祝四輪車亦毀棄於此平南黎
謙亭有甕玉行紀其事和簡勤紀以二律云詔棄于闐
玉埋輪蔓草蕪來從西旅道采自屬賓隅駕鼓勞天馬

投淵卻海珠何如此頑石罷役萬民蘇不刻摩崖字光
明帝德昭瑞同麟在野喜見鵲來巢崑璞完然古羌戎
逃矣朝鬼神勞守護莫任斧斤招葉爾羌山多產玉太
庵詩有纜別金山到玉山之句衛藏山多產金也黔地
多產朱砂自馬蹄關至用沙壩十里而近自用沙壩至
洋水熱水五十里而遙皆設砂廠洋熱之砂爲箭簇爲
箇子用壩之砂爲斧劈爲鏡面其龐而重者謂之砂寶
見田山蘊黔書黔人皆云朱砂小者如碎珠零璣大者
至三十觔而止嘉慶乙亥夏有客自黔中赴浙攜砂寶
約重百觔問其價值兼金千餘兩徧詢浙中大吏及豪

商貴公無有樂售者客乃廢然而返盛子履爲作砂寶
行有云神禹錫貢重斧砥曷不挾之獻萬乘豈知九重
訓節儉不貴異物 天子聖 睿廟初年首杜貢獻較
裕陵之季風氣爲之一變矣

米元暉楚江風雨圖卷自題云五月楚江風雨秋懷人
頻倚面山樓雲迷樹色遙成海水學泉聲暗入溝一斗
盡輸無事飲千金不買辟寒裘朝來洗研爲圖看共喜
煙雲絹素秋是卷爲婺源王養中所藏嘉慶丁巳姚夢
穀先生借觀累日爲作長句題之云萬山乘雲欲飛去
風雨江聲挾東注濤翻雨橫客登樓天地渾茫不知處

簾厓高下懸太陰霾霧溟濛見江樹颯颯風搖勁柯動
急雨小停江浪涌低昂島漱數舟行寂寞魚龍暮天恐
楚天晴甸亦蒼茫況值蕭條風雨涼山鬼含睇帝子怨
海洲忽近吳天荒破墨氤氳載元氣胸前突兀山川勢
不須慘淡擬形模元是分明出層次君不見阿章早許
元暉繼楚山已進先皇秘此圖卷末復題詩南朝又見
顛翁字父子崢嶸書畫學江山慨歎遷移事五百年來
江自流江城余亦澹淹留借來寶墨流虹卷且慰無憐
風雨秋傾倒甚至與惜抱詩集字句略有不同

焦里堂居在村落貧甚教授城中歲末將歸家見書肆

有通志經解取囊中資不足則借支明年脩脯金付之
載書歸與妻子啖蘆菔度歲沈子敦以銀九十兩買舊
本一統志人皆笑其迂江都治隄取土得唐人志石二
梅蘊生急以制錢八十緡買之載歸家倩衲庵几谷及
李梅生作載碑圖三徵題成卷江都黃承吉春谷詩云
淮南在昔唐重鎮大都督府王遙治近憑長史理一切
往往節度兼領之副使又副副大使入陣擊攬當熊貔
彎弧張劔擅勁絕以其官職原如斯大庾中年易總管
命陳少游統厥司將兵遏納納希烈亞旅宜合諸軍馳
才高詞美請入幕七擒百勝揮星旗其人其事旣已往

無復知有爲何誰田君姓字不見史一官原弗皆編垂
從來寥落失著顯雖有金石奚能爲戎行戮力在官死
田君葬在城東陲當時道梗不得返湮流極望空瀾瀾
生前震耀一朝畢正邱狐首情堪悲夫人同逝又無子
山邱華屋旋興衰咫尺佳城況泯滅更無人過相追維
牛蹄大跡雜兔走但看百輩墳纍纍幽光在彼不終闕
九原亦或希揚眉秦磚漢瓦尙纘粟何況珉質堅難虧
山光門前臥兩石一石一蓋如雄雌千年入土且十尺
陵谷頗似移高卑新從地底歛翻出隄役掘作當其基
不旁不綱正獲此抑何大巧愚人施梅生嗜古適有癖

茱萸灣去非遊嬉突然窺見訝奇寶購以狂態驅如癡
輿歸剝剔仔細讀一爲副使田公碑一爲夫人合窆石
文字筆畫晉唐遺唐碑此地不多覲文存石毀庸稱奇
顏書三絕本摹勒石幢祇賸陀羅尼崔圓李珣政聲遠
頌關節使今湮夷灞陵雖有從事讚亦復無器存其辭
田君兩石盡完好習坎反是剛中時不落他人落梅手
意者所謂神扶持惜哉晚出三十載錯過 纂定唐文
期假令先歸一網入久已貢獻珊瑚枝循名責實要可
許田君是否賢難知旁人比到汲長孺一語可定君妍
媿梅生買地輒欲墓不管兩石離其尸石能載彼死不

朽勝列馬虎人羊歆贊賢臨灣兩坊署今茲宛在途非
岐中間歷徧眾攻守幾輩爵祿君肩差鼎鐘湮沒竟何
處不如此筆參軍摛參軍彙儲人不識但覺入紙如墳
簾數行揮翰足永久那數百萬轅門師文人只此逞一
快千秋得譽何嫌遲倚雲臨水依舊穩暮成我去添藩
籬清樽奠醑一杯酒亦足寄我遙相思高齋從此費紙
墨一榻萬本人爭貽已將初榻先贈我得不佐汝縣之
詩此題誌石詩經書於卷首者也春谷乙丑進士詩筆
極見浩瀚吾鄉題者有恩隆岳昌承齡裕恭裕誠裕堃
慶布裕恭印記曰話石山房慶布印記曰小紅鵝館

江陰人以詩名者自元末席帽山人後明代之卞華伯顏寶之國朝曹祭酒未庵翁徵君霽堂爲最伊墨卿謂史有光然冰筆致高曠呂石颿則謂其七古頗似樂天其鄱陽懷古句云一戰匹夫成帝業九傳天子作將軍萬華廷謂爲新穎得未曾有然所刻問樵詩鈔殊未能廢人意賽尙阿玉麈嘗從受業季仙九則其外孫也

八旗官學之制有咸安宮學有景山學有宗學有覺羅學有八旗官學有漢軍義學有幼官學設教習設繙譯教習設弓箭教習以教督之設管理大臣總副管以約束之宗室黃帶子官學東西城分左右翼各兩翰林教

習輪日稽課咸安宮學在內西華門內爲八旗官宦子弟讀書之所兩翰林爲漢總裁按日稽課其殿西西配殿讀滿洲書則滿總裁稽之伯熙祭酒復官學議擬修復變通之法甚詳在意園文略中嘉慶閒武進徐叔瞻以舉人考取咸安宮官學教習期滿引見以知縣用時銓部患積壓教習班需次都下者且百輩候選無日叔瞻倡分發之議偕同班呈請疏通吏部以聞報可教習班之得分省候補自此始叔瞻名宗鄭李申者嘗錄其詩刊存之伯熙之言曰八旗之人不及漢人什伯分之一八旗之京官乃多於漢人數倍荒陋貪鄙動爲人笑

筆帖式旗官之初階也近者乃不由學而由捐黃口乳
臭目不知書伺候堂官有同奴隸浸而升司官浸而放
道府甚且長封疆長臺閣內患之所由起外侮之所由
來孰非此輩階之厲哉其文經序云和珅擅政凡其識
拔旗人以巧趨避爲德以工鑽刺爲才以善進退周旋
俯仰爲知禮而風氣變營第宅美衣服飾廚傳蓄姬侍
寵奴僕酒肉棄於衢綺羅照於市樓臺相接鐘鼓相聞
恣睢跳踉於輦轂之下嗟乎此爲八旗言之也至光宣
之間士夫之官京朝者咸奉此輩爲師而罔上負國不
獨不學之旗人爲然矣吁可畏哉

和致齋爲福州副都統長保子充上虞備用處侍衛例
有幫御轎差一日 高宗因事誦論語云虎兕出於柙
龜玉毀於櫝中是誰之過歟隨從諸臣皆不能對致齋
率爾而奏曰典守者不得辭其責 上大悅立挑入御
前侍衛游致大用有女眇一目欲與煦齋協揆締婚恐
其不願求 上爲指婚協揆尊人文莊因馳赴阿莊恪
家求其第四女爲子婦翌日 召見果諭及婚事奏云
已與阿思哈有成議矣乃已其後致齋修怨致文莊鬱
鬱以終嘉慶四年五月始追謚予祭諭祭文有如松柏
之後凋藹如春日無蔦蘿之肯施介比秋霜碑文有茫

乎莫知其岸度本懷清狷者有所不爲操惟履正之句
蓋褒其實也易曰君子以遏惡揚善順天休命鄭注謂
行誅之後致太平 睿皇帝有焉然致齋亦有可紀者
明心爲士夫崇信蔣予蒲等至甘爲弟子獨爲致齋所
訪拏松文清爲所惑至獎以官媿致齋多矣致齋弟希
齋和琳隨園嘗筆之詩話聞係黃小松爲之作緣于和
盛時達官清選固多奔走其門盛子履春雷篇云青旗
蔭華甸蒼駕騰祥麟九霄霈天酒萬象開陽春中田藝
黍稷芄芄競懷新抽芽疊青玉吐穗環綠雲初歲緯厥
耒合耦農力勤能使田峻喜無勞遂人巡莠草潛萌句

僞者能亂真一陰卦占姤初生象爲屯春陽布膏澤同
受栽培恩茁葉漸柔茂滋蔓旋輪困橫攢且旁突亂絲
萬緒婪欲藉膏飫壤據作要路津郊原一以眺野色迷
黃昏老農輟耒歎棘手不可耘天威勃然怒雷車走麟
麟烈風摧其條雷火燒其根青蕪飛赤燄一炬騰煙焮
嘉種實穎粟漑以雨露頻農夫攜婦子額手交權忻嘗
稽草人職周禮灑具陳駢剛利用牛鹽瀉利用豨餘根
作糞種勿使成荆榛根莠雖誅鋤亦感皇天仁五穀種
之美無雜蕪稗羣早晚盼成熟稔黍高下均楚芡籥奏
雅土鼓詩歌幽泉貨國用饒保聚民風漳苾芬潔享祀

簠簋歆神人義兼比興已未春日作也若舒立人冰山
曲則太透露矣

甯夏陳忠愍福字箕演征討三藩時功績最著官陝西
提督爵三等子王文簡典試入蜀稱爲儒將者也曾孫
大用字樹齋襲爵嘗在乾清門行走乾隆六十年於江
南提督任內盤獲洋盜彼時蘇凌阿署江督以誣良爲
盜定擬置游擊楊天相於重辟而和珅與蘇凌阿因係
媼親爲之護芑樹齋坐是謫戍伊犁已未三月呈請叩
謁 梓宮賞守備陳雲伯題其賜詩樓紀年錄云將門
出將重前勳忠愍家風海內聞西晉史傳羊太傅南朝

人愛謝將軍籌邊武帳聽蠻雨橫海樓船識陣雲小劫
龍華回首憶一編珍重護靈芸曾是 先皇侍從臣攀
髯一慟泣龍鱗 聖明久燭重淵暗天雨能回小草春
報國久懷投筆願從戎原是受恩身祇餘一事中心歎
不死沙場志未伸賜詩樓者康熙乙卯忠愍死節惠安
堡賜祭葬 仁皇御製詩一軸予襲九次錢竹汀與樹
齋善爲續家傳所謂衛霍功高一再傳而失侯而公之
後嗣皆能以功名自奮者也

陳恭甫和謝甸男云劒外塵沙落日昏珠鈴幃幄莫輕
論彝陵羣盜窺秦塞夔府孤城阻益門豈少蜺旌專外

闔仍煩虎旅出中原可憐一片關山月夜夜霜刀照雪
痕廿載飄零劒氣昏青尊細雨夜深論詞人自撰河清
頌兵法難通太乙門阨塞山川問尸佼激昂肝膽託平
原麗才媿擲封侯筆潦倒青衫有酒痕甸南廣文名震
己酉舉人東越文苑後傳稱其篤學熟三禮旁逮篆隸
金石星卜形法醫術靡不通曉數往來河洛關隴荆益
閒乾隆末自四川歸過漢中謂人曰終南巨七百餘里
連跨數郡秦蜀門戶也守險安可忽耶庸以西夔巫以
東巴閬之北武都之南大山老林螳蟻其閒今將吏徃
承平而弛控馭不數稔難其作乎及嘉慶初邪教起襄

陽蔓延秦蜀果以南山爲巢窟朝廷於是卽山內置大
帥宿重兵改五郎營爲寧陝鎮廣文言皆驗詩曰櫻桃
軒集得恭甫杭州書云參軍蠻府嘲鸚鵡措大荊州賤
鯽魚意極激揚

長沙周希甫太守有聲以中書秩滿出爲同知會南籠
狃苗之變揀發入黔參勒威勤軍事百文敏與初頤園
交奏其才擢大定守遇事之當爭者未嘗遷就上官之
意文敏嘗贈以詩云凡事要須攻我短此生安忍負君
言文敏督兩江挈之來吳權松江蘇州兩府舒鐵雲嘗
記室郡齋其歿也鐵雲跋其東岡詩牘云斯人豈遂以

詩傳收取聲名四十年隨會九京如可作鄭僑一涕獨
潛然龔黃治已揚前績元白才猶壓後賢太息結廬周
彥祖生平懷抱此縣縣希甫嘗讀范史周變傳而慕之
故以東岡自號也秦小峴論楚南詩人與周半帆孫石
溪唐陶山並稱而希甫爲人伉爽有智略其爲吏廉囊
無私錢遇事識大體尤足尙云權思南時募鄉勇破走
銅仁石峴苗銅仁與湖南之鳳皇乾州永綏連界苗民
數出爲患兩省合設礮堡以備不虞希甫與相度之役
時傳重庵爲鳳皇廳同知來會議謂銅仁黔地宜專守
備楚中可不復設且從之矣希甫力爭以爲銅仁四面

皆楚壤脫有警楚無兵必不能救是坑黔卒也重庵曰
三廳兵少奈何希甫曰黔楚皆國家版圖不宜各分疆
界楚兵少當請於大吏籌畫添設豈可全責之黔且有
事害不獨在黔重庵改容謝曰公言是卒各置兵自是
黔楚無苗患郭頻伽爲希甫作傳敘其政績較小峴銘
墓之文爲詳

呢玉亭初襲其尊人世職由侍衛出兵川陝楚三省游
升南陽鎮總兵許蔬圃懷人詩箭梟錦纜凌公績手奪
蒲弓仲子崔千古英雄多孝子南陽鼓角報讐來嘉慶
庚辰擢成都將軍道光四年卒於官謚勤襄

許蔬圃名所望字叔翹懷遠人脩榦亭視有奇氣歷游
諸侯間嘉慶癸酉胡果泉屯兵太和挾與偕事定後以
其名聞于朝歸而閉門種菜塊然如枯禪李中耆爲序
其詩謂張翰風瘦削怯縮如不勝衣而風氣矯厲不隨
人爲圓方善論往昔成敗尤熟天下阨塞形要著書數
萬言包慎伯長不滿五尺十三歲著兩淵以擬孫吳
仁宗親政之初詔取直言慎伯揣摩時事援比古義爲
說儲數萬言欲上之而未果一時以爲洛陽少年三人
者皆工詩而蔬圃年最長白鬚鬢其邁往凌厲之氣
一寓於詩語出胸臆而出奇無窮云云固淮潁閒伉健

絕特之士也至檀默齋推其詩爲江北第一家則過譽矣其和吳清夫翰簿韻云不負此番歸去來新詩聞唱夕陽催公孫五十猶徵士弟子三千盡妙才絃板乍翻江上曲煙濤真奪海南魁山程細數圖中句知我如君事可哀一識荊州髯絕倫胸藏十萬憶前身青萍按劍常爲客白羽談兵大有人宣室何年收李廣鄴臺終古弔張賓篋中共有英雄記投老相逢淚滿巾清夫名賢湘甯化人受業伊雲卿光祿之門與墨卿及張孟詞齊名乾隆乙卯進士官邵武府教授

錢魯斯未成童卽孤露事母夫人至孝年逾六十若嬰

兒子然自號僕射山樵有僕射山莊詩贈躋不偶以善
書名多識前言往行吳山子謂其酒後述百數十年事
往往終日夜或未竟明日復之一字不遺詩如枯桐云
亦曾託地說朝陽到此何心引鳳皇百尺縱教留節榦
三秋甯復鬪風霜蒼涼擬就山中老倉卒難辭爨下傷
不道琴材偏覓得薰風一曲佐垂裳亦感遇之詞也

嘉慶二年春正月貴州狃苗韋朝元妖婦王囊仙舉兵

反王囊仙者故洞灑寨苗婦自稱皇僊娘娘所率苗女甚夥當丈寨苗韋朝元綽號七絡鬚以囊仙有幻術

羣苗信之推為首以作亂焚掠諸州縣堡塞進犯南籠府城勒文襄

以雲貴總督率師討之自安順至普坪轉戰五百餘里

閏六月解郡圍 仁宗以南籠士民被圍久能同心固
守賜名興義以旌之賊退守巢穴數挑戰不利我兵乘
勝夾擊屢有斬獲八月十五夜分兵八道環攻之賊眾
宵潰總兵官施縉游擊王宏信生禽兩逆還營檻車送
京師復禽賊黨王抱羊於額老寨攻解永豐圍永豐官民堅守
州城賜名貞復冊高狎苗平文襄以功晉威勤侯時舒
豐如興義例鐵雲為黔西道王朝梧治文書文襄賞異之召至軍中
與計事至是獻凱歌三臺體詩四首文襄短小精悍與
文士論交誼加禮貌優待緣營將士各盡所長人皆樂
為之用自雲貴移督四川勦辦川楚教匪與和相意不

相中屢被切責己未正月授經略節制五省力持堅壁
清野之策與瓜爾佳公額勒登保烏密特公德楞泰協
力平寇卒於己卯年八十汲修主人稱其入閣後斂鋒
芒日事飲宴實多智之士也

李武曾教子弟讀書之法云前賢下語俱有根柢爾輩
讀書不多有不當意置之可也勿雌黃一字不按首尾
不考出處意所未曉輒加芟易此明季以來空疏剽汎
之惡習小子其戒之焦里堂答黃春谷書去秋僕在錢
塘適劉孝廉嗣綰自都中來僕有詩曰落花時節燕臺
醉十里松風又共聽蓋以唐人李紳赴鎮會稽思游天

竺靈隱而不暇因慨然有十里松風之句僕自念與劉
下第歸來方有此游若使如李紳赴鎮轉不得共聽松
風耳事非深僻意亦淺露而閱者乃以爲松風當改作
松濤因思韓非說儲自爲經而自爲傳謝靈運作山居
賦顏之推作觀我生賦皆自爲之注良有以也觀此可
知詩人用事各有意在不宜妄下雌黃

潘惠孟游長洲布衣天趣自高居齊女門外築小樓三
楹天晴西望陽山了了可辨顏曰山照樓叢書其中流
覽坊肆閒蓄書畫賦小詩自娛否則相羊山水閒桃花
云燕雛聲裏雨如塵陌上風微困酒人紅破小桃纔數

點江南已是可憐春錢明霽聽默以鬻書爲業博聞強
記多識古書源流及傳本之良楷閒爲小詩湘簾云一
鉤新月壓波光庭院深深午夢長簾底幽蘭簾外日不
通暑氣只通香吳枚庵樂與之往還錄入懷舊續集
徐魯南圭美堂集有五肴約玉達齋撫浙有五簋約謝
蘇潭詩云中丞總庶政清節百僚壓餘事及鼎烹豐儉
示成法座有真率銘溫公高義洽晝堂約五肴古愚

中丞臭味同淡泊性所狎仕宦恣口腹流毒到鵝
鴨銀絲探海燕蠓山並馬甲非惟損儉德亦恐傷慧業
真意苟不存禮繁力已怯鼯鼠飲于河果腹供一呷易

占享用二倍之豈褊狹潔治陶盤精酬酢主賓夾萬羊
公有分千錢我豈乏饜饕聖所戒勒文申先甲藜莧撐
枯腸餽飮容恰恰回憶消寒飲鳳城聽鶻鳩

查松莊相國以雍正十一年禽賊于古吉兒和碩齊郭

朝祚爲繪征西圖 御賜詩云玉陞資調燮西陲運計

籌持鈞推舊德補袞著嘉猷可繼蕭曹業還同韓范儔

江湖與廊廟莫釋一心憂想見當時 主眷謝蘇潭爲

其裔孫恩遠亭題圖詩有臣能不殺三邊靖將在無貪

九石看之句謂公攜九石以歸繪有九石圖也

明孝豐吳峻伯中丞維嶽少受業於毘陵以詩振起嘉

靖閒與李先芳輩結社西曹初與王元美爲同舍郎實
弟畜之弇州嘗云峻伯首進我於社厥後厯下門戶寢
盛詩宗北地號王李持論不相洽元美作詩評與先芳
均置之廣五子中而大函爲峻伯所取士反躋而上之
其評峻伯詩則云如子陽在蜀亦具威儀又如初地人
見聲聞則進見大乘則小峻伯頗不平之裔孫應奎蘅
皋詩少日成名眾所希毘陵詩派早知歸敢因厯下持
牛耳遽忘雲山舊鉢衣蘅皋詩宗法峻伯及峻伯子大
滌以窮死陳白雲屠琴鳴刻其讀書樓詩郭頻伽題句
有云世無知己甯非命窮到奇時亦損才傳本不多近

年其族裔始重爲印行並及天目山齋歲編元蓋副草

二種

嘉慶丙寅翁覃溪寄懷方石亭詩揚州煙月作書城冰
檠衙齋是性情自注予方謂邗江自任幼植顧文子輩
砥礪經術近則阮雲臺訓詁經籍迥非昔所謂煙月揚
州而石亭書來謂額約齋鹽政署中冷如冰檠正與此
語相稱也約齋司空字履豐中丞農起子索佳氏嘗刻
宋小字本說文其政績具見包安吳所爲別傳沈楓墀
謂其觀風局試拔雋前者各予玉海一部禱雨者惟子
近郭獨赴甘泉山中文海鏡寰其諸孫也

嘉慶九年鐵梅翁采輯八旗詩進呈 賜名熙朝雅頌
集以山東省刻工不佳交阮文達於杭州校刊時仁和
張晴崖司馬秉鐸孝豐檄司監刻晴崖名迎煦累官永
州理搖同知丁未歸里留別楚中諸友云殢然自覺百
無能且學吾宗老季鷹皮相可憐成臂叟頭銜又復署
龔丞豈真樗櫟偏多壽未必參苓盡有憑算到不如歸
去好鄉心先已過吳興距官訓導時已四十四年也
仁和李堂允升隱居市廛致力詞學秋水望湘人云正
回潮落處反照明邊暮天初放新霽半帶蘋風半沈蘆
雪鷺下驚涼還起碧極涵虛澹將成夕無痕無際對一

江如練平鋪畫出吳風詩意濠濮高蹤渺矣坐苔磯窺
見鬢華如此是何處人歸櫓逐雁聲搖曳溪頭漲合亂
和殘葉冷浸漁扉深閉又望斷遠浦來帆翠閣凝眸人
倚自是雅音嘗入東軒吟社其順德雜詩云風雨連朝
海氣昏孤舟有客正銷魂長松兩岸青難了直捲寒濤
到郭門環海鯨鯢就戮空不聞鼓角警長風戍樓處處
無人倚分映斜陽一半紅初長春潮拍野塘畫橋低跨
水中央蕉花著雨開無數紅出人家牡蠣牆桺榔樹暗
掩雙扉軋軋鐙前正弄機手織素綢波細蹙輸誰裁翦
作春衣願涑園稱其詩格正氣蒼其爲老輩推獎如此

汪小米詩青湖朱老有薪傳格調先教偽體刪放浪江湖悲短李空將面目認廬山蓋傷其不遇也

王仲瞿游黃墩悅一禪寺竟將住僧逐出攜眷居焉又攜一妓同寓短主簿祠卽所謂團扇夫人者也王文璋詩才人好異魔難遣名士隨緣佛亦飢可爲文人無行者戒乃有與黃仲則並稱二仲而私淑之者殆未深考其逸事耳

華亭沈恕綺雲爲孫季迷門人曾刻紹興雲間志唐宋三婦人集梅花喜神譜諸書王惕夫其婦兄也有詩云太息鴻堂帖今同鳥篆書墨稜磨欲盡紅目贗非初蟬

翼翻新拓蠅頭證舊儲姑教存故物數典述鄉閭謂戲
鴻舊石歸綺雲也其尊人元昆初築室城內明范太僕
獻園故址曰聽松軒後爲園北郭元倪高士嘗棲遊處
謂之古倪園惕夫嘗爲作古心翁傳及墓志

吳韻皋七贈詩序謂吳中經術則顧廣圻徐頰算學則
李銳沈培文章則戈襄顧燕謀林衍源徐穎詞賦則顧
藁李福陶梁人賦一詩以紀蹤跡顧澗蕢取邢子才語
以思適名齋爲從兄抱冲刻列女傳爲孫淵如刻宋本
說文古文苑唐律疏義爲張古愚刻撫州本禮記鹽鐵
論爲黃蕘圃刻國語國策爲胡果泉刻文選元本通鑑

爲秦敦夫刻揚子法言駱賓王集呂衡州集爲吳山尊
刻晏子韓非子每一書刻竟綜其所正定者爲考異或
爲校勘記嘗與劉金門段懋堂以言語牴牾韻皋詩所
謂少年盛意氣小敵必殲剽戈矛武庫森月旦東國闡
俗情忌刻露流輩許責善者也卒於道光乙未年七十
李紳者爲志墓之文謂其服膺宋儒徧讀先儒語錄摘
其切近者爲遯翁苦口一卷以教學者與爲漢學而訾
謗宋人者異矣徐少鶴少與弟季雅同學師承江惠著
有兵論以大考第一受 仁宗知遇官至侍郎沈狎漚
師事李尙之爲周髀三統之學戈小蓮工詞章以毀卒

昔惠視溪論學謂儒有偽有迂有曲有俗有雜有博有
醜有通賈逵傳會圖讖劉歆顛倒五經是爲偽王夷甫
談黃老房次律說春秋是爲迂公孫希世用事孔光與
俗浮湛非曲歟朔舉持論不根張王淫靡不急非俗歟
夏侯破碎大道賈山涉獵爲儒非雜歟如康成辭訓質
而繁穎達正義詳而冗博矣未醜也楊雄覃思渾天張
衡候風地動醜矣未通也賈長沙之匡建劉中壘之忠
精魏元成之剴切帝心陸敬輿之譏陳時病其言足以
救世其道足以輔君斯可謂之通矣小蓮本惠氏之說
輯大儒傳道錄名儒傳經錄小人儒錄各若干卷亦學

統宏道錄之亞也

吾鄉佟敬堂先生致力於朱子之學所刻讀性理修身說綱齋劄記等書皆務篤實以爲訓自編修出守施南以先賢格言刻爲童子歌謠俾傳習之歷滇黔道府治邊久雅尙教化所至誠格吳蘭雪送其之官臨安云居官談理學往往笑迂疏巧宦先知免循聲定不虛看山今萬里按部祇單車行李無多物隨身數卷書句町牂牁地邊城古百蠻恩威防失馭教養必相關吏治澄清後民風秀愿閒歌詩傳習徧騎象且游山提刑廣西與宗滌樓質疑問難其言學以修身爲綱統誠正格致皆

貫於實修之地一切覺悟宗指稍涉空虛卽所不談視
河津餘干之專言敬者庶乎近之滌樓於桂林之華嚴
精舍相與推論心體反復辨證敬堂深相容納至稱主
張陸王無害於宋學亦不拒之也藩皖數年一再權巡
撫事仁惠周洽處大事有定識道光丙申卒官年六十
一滌樓表其墓比之蝶園淵若用方諸公爲湖北學淵
源者所必津逮云

震澤張鱸江與鐵夫淵甫稱三張以乾隆戊申舉子鄉
客董文恭第文恭以母憂告歸時川楚方用兵鱸江慮
其將不能終制從容進諷未幾果以軍務奪情意頗不

善之持己及人莫不以義能守經無私求以故老而不
遇王暢夫稱其文不作高談而中有自得辛酉下第戴
簡怡刻門卷時并其文刻之鱸江卷實非戴所薦亦未
識面也嘗論譙周爲漢臣而勸後主降魏引堯舜之禪
舜禹微子之歸周以自文飾欺君甚矣能欺天下萬世
乎旣受魏封又拜晉官而其死也自以年過七十與孔
子之七十二劉向之七十一同軌其與長樂老之自述
何以異哉陳壽嘗師事周遂阿其所好謂周之功能使
劉氏無虞一邦蒙賚則亦非直史也匡衡墓詩風草蕭
蕭訪古原漢官殘碣一杯存十年苦學常傭食四海明

經有眾論相業可憐阿石顯彈文無計避王尊更誰爲
種參天柏已見犁田近墓門與楊甫及陳碩士秦小峴
以古文相切磋而姚姬傳尤爲激賞謂擬之震川無媿
色輓姬傳詩有云也知非聖書難讀何意忘名事更彰
聞有山公會勸駕絕交未肯作嵇康頗能道其深處其
云感餘拂拭懷梁肅只少清文似習之則氣類之相投
可知矣

周星韻司馬景益以乾隆辛卯釋褐歷宰建德貴池擢
牧平遠值苗匪滋事守禦有功轉古州直隸廳所至有
聲五校鄉闈稱得土花方伯杰以第二人出其門嘉慶

壬申卒于官不名一錢讀史詩云咄咄衍浩徒攘臂講
名實舉動似小異往往逞胸臆其如蒼生何民病亦孔
棘此曹不束閣疇其活邦國又云水勢分上下惟地之
所致民情倏向背惟利之所視治民無奇功不與民爭
利治水無善策不與水爭地可謂通識

上海水蜜桃前明時出顧氏名世露香園中露香園自
顧氏衰後爲演火藥所俗謂之九畝地水石猶有存者
桃無一株乾隆間黃泥牆李氏吾園產者最佳園主人
李筍香光祿屬褚文洲輯水蜜桃譜一卷陳雲伯謂冀
北肅寧之產山左肥城之沃得斯而三文洲名華瀨城

諸生有寶書堂詩鈔其己未新春書事諸作爲時所稱
湖州寶石山天然圖畫閣有張樗寮湖山勝概額石田
翁嘗寓此乾隆乙卯七月施非熊同楊傳九楊拙園姚
玉梁薄游遇雨傳九用樊榭韻作云飛閣平臨挹袂登
孤蹤猶記昔來曾湖光餉此臥游客秋色冷如過平旦
僧入定幽禽棲密筱無言蒼石倚危簾斜廊花隱留高
唱屬和多慙我未能非熊同作云岳腰佛閣喜同登圖
畫行看一紀曾塔影會留圓夢峇湖光長屬在山僧雲
松百尺纔平檻玉鼠千秋尙齧籐媿我年來筋力減超
然不似舊時能張秋水作云佛閣梯桮拔袵登四山涼

翠記來曾白蓮社肯孤良友壞色衣須借病僧拾果野
獺窺石礪聽經仙鼠拱秋籐他時再結宗雷約莫道攢
麋我未能李白樓和作有巒翠溼衣初過雨竹陰扃戶
未歸僧之句非熊詩如奉華堂澄泥硯歌云墨蛟騰舞
方池研秋澗曾題德壽殿故物飄零不可求又見香銘
傳淑媛絳州雅質製復工研蠟搓油玉一片奉華細識
塹厥背昔棄妝樓近歌釧流聞北內大劉妃翟羽鸞綃
荷天眷是時帝后重文玩簪花麗格傳摹徧細書阮譜
已妍妙能事更推縑素擅玉座宜陳補袞圖那數宮衣
染添線當年研也銷春倦晝暖紗帷侍清讌翡翠裝匣

琉璃鈿純銀臺啟文綾薦水晶腳踏臨錦窗蠟紙番番
皎秋練畫禪草聖兩擅長標漚池躍溟魚變堪嗟汝研
遭寵榮捐篋何曾等紉扇回首濃華如抹電宮斜鳳去
無人羨研乎幸不殉思陵不爾影魚並發竈鳳山月冷
土花昏金粉叢殘今一見侍郎好古鑿賞精綈几錦囊
擁黎院頻值西清東觀來玉軸琅函入編撰寶此一日
三摩挲鉛槧親讐五千卷請續芙蓉並蒂詩沈吟如覩
春風面聲調格律不減秋水之作硯宋思陵劉貴妃物
阮文達所藏也非熊先世居長城堯市山下自號堯市

山農

章實齋修湖北通志有戚某爲經理局務信之不疑一
旦盡卷其所有而去見沈赤然贈實齋詩赤然又記唐
縣知縣伍君紹煝事紹煝福建人揀發直隸有僕曹某
本保定惡少窺伍需次資用乏因謀措百金貸之相要
以得官日任以司閹伍尋權無極縣事曹盜權恣肆頗
增官謗伍交替後卽償其前貸蓋示以不復用也然未
嘗誦言遣之故曹亦終不言去後數月伍補唐縣令就
道之日諸僕各有任使獨不及曹曹疑伍弟某軋已將
甘心焉某急掩關避之曹搥戶毒詈及其主伍聞聲出
叱責以前事曹挺刃直前中要害殞小人兇很無忌誠

寸磔不足蔽辜而伍之不慎於初不斷於後亦足爲鑒
戒矣

夫子亭在漁子山之麓於陵陳仲子所居地也漁洋山人解組後卜築於此門下士新安程友聲爲寫圖山人題二絕句以贈載集中乾隆閒圖爲桂未谷所得未谷游京師紀曉嵐吳穀人皆有題詠翁覃溪重加裝池并接漁洋年譜作爲小記且仿山人書將原詩錄於上方後藏魏霽巖太守家江陰夏循陔爲題四絕霽巖爲德定圃門下士循陔則英煦齋門人所謂孔李論交誼不疏淵源同溯老尙書者也道光癸巳陶雲汀議建營於

老子山放舟龜山訪支祁井至盱眙游玻璃泉望泗州
明陵故址賦詩紀事循該時秉鐸盱山有和作嘗得蕉
白硯自作玻璃泉洗硯圖李申耆詩云止此一勺水少
療季女飢懷中紫玉段持照青玻璃仰瞰積鐵壁俛蔭
離披枝勿放墨龍出驚起無支祁古岳瀆經禹令庚辰
鎖淮渦水神巫支祁於龜山之足淮水乃安今以龍山
爲龜山故稱下以別之在盱眙縣東北三十里

黃九蕘圃每於冬底作祭書之會顧吳羹詩憶昔時過
叔度廬宋雕元槩辨紛如戲從買島翻新樣不祭新詩

祭舊書

蔣生沐刻吳中兩布衣集一陸鼎子調一顧承燕謀子
調善書畫身如牧犢時時舐筆和墨爲人驅使燕謀習
青鳥家言年八十猶爲童子師皆負異材皆性僻不諧
於時輒軻無所遇子調少時避暑青蓮庵得句云上堂
不逢僧梅葉滿階脫又游鄧尉有空山落梅葉之句王
琴德賦梅葉聲詩叶碧簫之句以贈因自號梅葉道人
謝薊泉爲作梅葉閣記燕謀與澗蕢少卿稱三顧從彭
秋士二林汪家南游專治詩古文尤長於易兩人阨窮
不怨遺佚不憫守經腴道同享大年少卿名曾字駿文
俠君吉士曾孫爲文追北宋病南宋文漫無統紀遴選

得三百餘家以爲文鑑續門人莊仲方卒成之

宋姚寶臣唐文粹仰繼蕭選俯開宋鑑郭祥伯謂古今
文質唐實其樞復纂補遺二十六卷其舟中讀文粹作
云道敝文章五百年子昂高蹈起羣賢昌黎倔彊先低
首一序請看修竹篇大筆鴻文世少儔卻憐毛穎賦時
流兩公心有千秋印法度還推柳州賊退春陵涕泗
流番番謝表見鴻猷莫將一片磨厓頌了卻當時元道
州悲涼瞧殺異前聞羅隱陸龜蒙司空圖殿一軍解識
離騷爭日月固應不廢晚唐文男兒恩怨豈能灰太息
樊川不世才三乞湖州緣病弟又教人道水嬉來三唐

猶見舊規模樹骨仍先麗藻鋪文柄若同持國例須知
變法是歐蘇會昌勛業比元和其奈中朝黨論多不及
武夫能薦士令人千載憶常何小雞山序開元報掩抑
紆回見此情試讀少陵諸樂府可知天寶是昇平補遺
序謂有唐之文代凡三變厭習靡熾翫開宏麗巖廟鉅
製有開必先王楊而後燕許代興而載之至之出焉豐
縵冠帶威威儀儀華則榮矣恢張病之於是築立峻悍
倣儻張施程古切今橫厲蹕蹕曲江梓潼揚之而未宏
昌黎河東卓然而倡號一時從風若羽翼鳳而腳走麟
李氏皇甫氏之徒爲其佐矣文章之運與世升降日昃

月虧風流迢然其有憤發毅雄信道不惑遭值末流悼
歎膈臆忠信彊仁又足以副之而加學焉時無鉅材驚
盪自熹孫劉皮陸司空氏由此其選也合舟中作觀之
可知持擇之大凡

陳白雲初宰青陽轉合肥遷鳳穎同知攝甯國守以涇
縣獄疑誤被謫免歸弟子南豐劉斯崑刊其集平苗恭
紀云冢中古冶子含笑慰田彊梁甫悲吟後人哀三士
亡明堂登有勇馬革裹無傷百戰干燒地誰非古國殤
軍書落臥席飛起健兒魂死是從戎志功當大將論一
戈揮白日兩月盪凶門勿革來降種餘生盡國恩隱隱

大軍山峩峩白雁關莫令九嶷盜得竄五溪蠻巨帥分
持節微生輒怒頭幾旬銷鐵甲六道有孤鰕苗民宜絕
世聖代豈勤兵宥彼叢篁地休吾虎旅征馬蹄堙窟穴
鈴舌靜滄僂我士有餘怒光天欲並生

仁和湯禮祥點山工詩守西厓少宰家法專主於清陳
雲伯贈詩有一卷懷清集寒吟屢翦鐙之句以簿尉試
吏江南有栖飲草堂詩鈔同時陸紹之文學祖授爲白
鳳堂梯霞先生元孫承家學詩學東坡有眉洲山房稿
江鄭堂主王文端邸第二十年嘗恭撰 純廟詩小注
由文端進呈恩賞御製詩五集後許召對圓明園因聞

林爽文逆信廟謨勞旻遂未果召

李辰客侍御有春日溯何山至侯山尋小隱園遺址經
明相國錢文貞公先塋訪讀書處不得詩其第五首云
山下多墓田晚風驅犝牛相國昔表阡蒿廬隱松楸兒
孫不能耕尺地空貽謀生男作賢輔零落無山邱遙問
讀書處春煙鳴沙鷗蓋文貞少時曾絃誦此地墓左一
碑盡刻文貞自檢討至少保封誥去墓數十武爲國
朝湖南按察使贈巡撫傅公弼父墓墓右一碑刻嘉慶
十二年傅公官辰永沅靖道加按察使銜上諭深褒其
苗疆勞績末有傅公自述先德之言傅公勤能以廉尸

祝湘服子姓零落宿草不除辰客益深慨之按傳字重
庵山陰人宛平籍起掾吏爲廣南經歷升甯洱知縣嘉
慶初以鳳皇廳同知總理邊務洊升道員勦撫兼施苗
民安堵十四年簡任臬司十六年卒有重庵文集觀其
上巡撫高杞書復總督百齡書所設施可略見嗣子名
端弼辰客所記傅公弼疑誤

景山內垣西北隅有房百餘間爲蘇州梨園供奉所居
盛子履學博鐙市春游詞咬春燕九集梨園十棒元宵
羯鼓喧崑調居然小良輔教師傳進景山門

子履官山陽學博鐵嶺厚莽茂才達麟從之游有雜詠

詩嘗同集李少白齋中分賦淮陰古蹟厚庵得萬柳池
七絕二首云載酒無人往聽鷗棟花風過畫樓西祇今
煙雨空濛處省識當年舊柳隄荻葦蕭蕭正暮天落霞
還照隔溪煙關心最是蘆汀雁迢遞南飛又一年

桐城方績展卿纂屈子正音三卷以廣韻爲主廣韻之
謬者以古音正之又以朱子集注專用吳才老韻補其
中沿譌多所釐正鄧嶰筠尙書又審定疑義雕板以傳
離騷好修以爲常與下懲字爲韻鄧云常本恆字漢人
避諱改作非陽可通蒸也九章豈至今其庸亡與下完
字爲韻鄧云亡完不叶據王逸注完當作光離騷惟庚

寅吾以降方云降古音戶工反廣韻入四江古音東冬
鐘江陽庚爲一韻鄧謂顧亭林唐韻正孔奭軒詩聲類
段懋堂音均表皆不言東冬鐘江與陽庚相通九歌風
颯颯兮木蕭蕭與下憂字爲韻方云憂字古與蕭宵肴
豪同韻廣韻入十八尤誤鄧謂詩聲類以幽尤蕭爲一
部音均表以尤憂爲一韻而以蕭茅等字隸之蕭從肅
字讀若肅廣韻與游求憂等字入十八尤不誤俱極精
當盛子履有書屈子正音後五古一首游皖江時作也
子履蘊懷閣別集楚辭注釋參校序有云文約辭微行
廉志潔龍門論騷魚乎尙已賈生揚子重其才悲其遇

昧其制行誚其輕生而班固露才揚己之論之推家訓
引而襲之以爲顯暴君過懟忿靈修曾不思河麋微種
飄風攪心山蕨槁楫管華苑柳忠愛之意奚以寄焉故
劉勰謂耿介祗敬之論體備典謨虬龍雲蜺之詞義工
比興特豐隆求女鳩烏媒妁擬斯之類稍近詭誣知幾
謂宣僖敷政載在周詩懷襄信讒著于楚賦頌固非諂
刺豈同謗猗與良直尙友董狐持論乃爲至當雄鳩佻
巧厘鸞弁之閔憂蘭芷蕪穢寄荅華之哀怨云云其文
甚爲嫺雅

沈滄洲學博端爲敬亭光祿文孫博學嗜吟詠藏書頗

富手自裝治雖舊書皆完好如新室中四周書籍鱗次
案几設刀砧礮石鍼線漿醃皆具以舉人官甯國訓導
時周伯恬訓導宣城子歿甫幼雋異能發難論古以對
長老滄洲愛其才呼爲小友滄洲工奕喜飲治飲饌精
好每過從必爲治食譚論文辭卽命奕恆竟日嘗言其
祖光祿官方伯歸婦女無金銀爲妝飾者光祿歿後其
尊人遂開書肆以給日用滄洲束髮卽酷嗜書老而彌
篤好有異書必百計購之往往典衣償值寶其書不肯
假人歿甫初借沈鯨溪手批精華錄約日往還并爲補
其缺葉滄洲始不折其所求以藏書縱其博覽歿甫懷

舊詩所謂先生廉吏孫承家守清素垂老爲儒官樸學
彌勤劇丹鉛列萬本兀兀窮晨暮刀鍼自裝治割線善
布獲可以想見其風致矣

嘉興曹言純種水有徵賢堂詩八卷郴州絕句云貧與
丹砂未有緣病於黃葛亦非便蓮根自印新詩橐橘葉
從調舊井泉已涼云已涼初試夾羅新小管聽吹側調
銀簾箔玲瓏燈火裏隔河樓閣未眠人皆有致早春游
東園句云凍解穿橋水香生倚竹花亦佳種水字絲贊
自弱冠後專心詞章之學家苦無書借人書籍節取其
精華蠅頭細書三十餘年無慮數百冊以明經終其由

拳思古詩云谷水滌城隅柴辟知何年十世城下居盡
荒負郭田飲水且種水引竿刺吾船樂飢視清泌擬著
衡門篇向來石倉儲籤帙亡蠹編含情抱殘缺風流溯
遺傳網蛛發鎖篋不重金粟箋紛紛得故版猶知是由
拳青竹能直青白鷗常潔白自守有本性相忘共草澤
四壁空無餘顛倒滿書籍黃金雖可求白髮忍爲客居
然萬里人歸就五湖宅安知子邱子三畝乏遺迹陋室
初何存清風勝列戟長懷感至行耿耿誦朝夕皇甫持
正謂顧逋翁披黃衫白鞞頭眸子瞭然炯炯清立望之
真白圭振飛種水於此蓋有尙友之思焉

唐陶山方伯有岱覽圖其尊人石嶺公知平陰縣有遺
愛太夫人葬肥城之陶山爲岱麓支峰陶山主講岱下
時撰岱覽三十二卷較聶鉸道里記爲詳校刊於海州
許貞仲詩有云講堂瞻雲罕親見東人樂乃以冠古才
載筆揚景鑠篇終誦清芬人足重林壑子鏡海太常官
臨湘訓導有瀟湘聽雨圖丁卯舉於鄉己巳通籍由臺
垣出守洊厯藩伯有不能讀父書圖岱麓耕雲圖江樓
話雨圖己巳一科居諫垣而有建白者推龔聲甫王藝
齋陳午橋及鏡海著有學案小識宗陸平湖闢姚江倭
文端曾文正吳竹如侍郎廷棟竇蘭泉侍御埈何文貞

桂珍皆從問業卒諡確慎有四砭齋文存

嘉慶辛酉補亭侍郎潤祥由外班庶子擢祭酒自其高祖鄂拜叔曾祖鄂爾奇叔祖鄂容安至是四世居是官遂有四世司成詩卷題者甚夥翁覃溪先生詩云敬陳祖德紀君恩字字箴銘勛後昆四世清班超史牒中天盛事在橋門圖書東壁光輝接闕闕西林掌故存忠孝傳家餘手澤摩挲寶氣記同論科第欣逢甲子周丁闡款話記從頭每追秋賦奇文賞不獨春坊接武酬碑石題名推世胄辟雍鐘鼓儼箕裘六經綜括羣書目於古官師有此不忠孝傳家謂剛烈公所藏文端公四字田

黃篆額其尊人庶子是歲重賦鹿鳴謙其叔祖與覃溪
同舉乾隆丁卯鄉試也若章佳文勤文成文毅四世三
掌院事尤爲唐以來詞臣之家未有之榮遇

紀茶星甲辰丙辰兩典會試壬戌復與熊謙山充正總
裁戴可亭玉研農副焉凡考官命下禮臣於午門前開
讀文達時官禮部尙書乃自宣其名乾隆戊辰曾舉宗
室會試至是特命開科著爲令文達閱卷後有袁翁那
識新花樣往事曾吟古戰場之句殿試策問首舉無逸
一篇硃筆增我 皇考嘗書於屏展八字先是乾隆壬
戌檜門總憲會狀連元是科鼎甲三人皆係江蘇狀元

吳棣華京卿則會試第一御製御殿傳臚詩期許特至有雙元獨冠三吳彥尙蓋本朝來似此者先祇得九逮吳乃盈十而天題榮寵則前所未有也朱文正彭文勤皆有和章文勤謝充大教習摺云得士至九十四人之多論年爲六十三科未有其同年雅集圖共有數本卓文端沈鼎甫龔叔雨兩侍郎及王雲榭楚堂家各本人數均微不同沈圖有龔侍郎記與卓卷李芝齡宗伯記皆仿西園雅集體爲之而李記特多感慨之辭相傳宗伯初有秉均之望晚歲還朝眷注忽衰未久卽引疾退故壬戌一科登揆席者惟華陽一人王氏卷與沈圖皆

道光壬辰畫壬辰畫凡四卷鼎甫侍郎以視皖學將出
都得第一卷卓卷成於辛丑時方入閣有梁茵林像蓋
從滄浪七友圖本增入者十五人中南康謝蕉石學崇
爲蘇潭中丞子著有小蘇潭詞秀水朱雲陸鴻最精天
算董方立嘗以所得相質若朱詠齋文定陶雲汀文毅
申鏡汀文恪則皆在易名之後所繪矣鼎甫侍郎題卓
圖云大羅天上詠霓裳瞥眼俄驚卅載強賴有畫圖傳
姓氏清游先溯小滄浪峰容樹色映鬚眉讀罷高文更
出奇頰上三臺誰貌得妙香室裏筆淋漓風雲萬里襟
期洽鐘鼎千秋樹立多放眼古人爭不朽紹興寶祐兩

魏科褒德於今顧問優偶吟野渡自橫舟客來不厭過
從數落落晨星幾箇留名花經眼酒沾脣氣味由來似
飲醇鄭重入林同把臂五湖煙水欲歸人侍郎與雲陸
同里最洽時雲陸歸自梧郡就養京師侍郎亦以耳聾
引退也昔李西涯天順甲申同年圖卷所繪不盡詞垣
潘文恭癸丑雅集圖及此卷皆同入翰林者顧南雅齒
爲長蕉石年最少芝齡作記時祇存十人海帆相國長
蕉石一歲自御史歷侍郎升轉甚遲晚年貴盛至咸豐
五年始薨棣華以修撰出守浙中官至雲南按察使遂
以疾歸御製詩望以作霖者亦終不驗其孫蔚若侍郎

有重摹本

嘉慶己未潘文恭分校禮闈詩題爲鳴鳩拂其羽得一
卷云須知溫室樹終待鳳鸞聲極爲擊賞榜發則桂文
敏也那繹堂閱己未覆試卷賞吳山尊賦得詩正而葩
詩中餘波屈宋同句每對客誦之

譚復堂序吳山尊文集謂學士定八家之文逸二汪之
作者山尊客揚州以素冊十幅寫曾賓谷詩意自云方
彙鈔平生師友隨園圃三叔山巽軒穀人雅存季述存
南容甫諸君文與賓谷文爲十家四六今刊行本無存
南容甫二家其自撰駢體文朱文正謂合任昉邱遲爲

一手鐵梅翁奉敕編錄八旗詩進呈表謝 御製八旗
人詩集序表均山尊代作也醉慰農爲輯遺詩有他人
之詩而收入者蓋從日記中誤鈔未及校正

水經注丙水發柏枝山山下有丙穴穴方數丈中有嘉
魚常以春末游渚冬初入穴抑亦褒漢丙穴之類也今
在綏定府太平縣東金華王西躔司馬嘗攝太平廳有
明通井觀打魚歌謂丙穴以明通院之明通峽十穴得
名宋升爲縣元廢爲井場十穴各有名若邛雅夔萬產
魚亦相似實未嘗有穴也西躔久令蜀中擢雅州同知
駐打箭鑪自巴塘裏塘抵西藏延袤數千里地爲進藏

要隘治文書儲供頓不廢吟詠集曰冰壺山館詩鈔冰壺與雙龍朝真方鳳所云金華北山三洞天也

長洲詹鱗飛嘗以獻賦召試拜上方文綺之賜長牧庵撫吳私淑呂新吾以呻吟語課吏屬鱗飛爲之補注其上牧庵書謂湯潛庵之學與甯陵相表裏潼虔之政自言奉新吾先生爲師及其撫吳時不設邏者不采風聞惟務察吏以安民故吏治日新民氣日固而以法睢陽者法甯陵爲牧庵規最爲得體秦小峴稱其詩豪宕感激顧多新聲側豔之詞殊與所評不類爲令鄂中有治績劉孝長詩所謂維昔有詹尹民依如父兄者也泰順

曾鯨堂亦爲小峴山人所稱其復齋集則說經之作爲多

吳韻皋侍讀爲曇繡方伯子與彭甘亭詞賦齊名己己庶常甲戌補行散館以一等一名授職編修自雍正癸丑至是補散館得第一者凡五人董文恪彭文勤其最著者也

甲戌林文忠散館第一授職蓋清漢書各榜

食俸五年卽擢司業不

二年游歷講讀蔣襄平爲曇繡分校所得士故韻皋與之友善蔣公子沛畚其壻也詩初刻者曰蘭鯨錄襄平爲之序視學河南乙酉滿任復有山左之命學政調任自乾隆乙卯阮文達自山左調兩浙後數十年中亦爲

僅見黃霽青詩有量移星使少簡畀 帝心專之句襄
平貽詩有明湖秋柳亦欣欣之句韻皋和韻有棠陰同
是感陳芟之句謂襄平贈公會牧平度曇繡亦維藩于
東同爲趨庭之地也韻皋詩學韓蘇繼蓮龕謂韻皋七
律尙沿晚唐體格有荅蓮龕句云詩宥攻吾短知公此
事深可謂虛己受善

嘉慶壬戌冬安徽宿州教匪竊發伊庭廉使珠隆阿率
親卒抵城下用火攻由扶蘇亭入一日平賊而還吳韻
皋詩宿州官晨坐衙白刃露立千人譁須臾廳前變
鬼哭州官頭顱血漉漉繡衣東來一馬驄帳前勇士何

驍雄鏟塚踏塹須臾耳賊刃斫來傷直指直指雖傷賊
已被五丈旗開軍吏賀紀其事也

丹徒嚴麗生大令學塗少時隨宦四川與姚公子春木
有齊名之目海雲堂詩文幾可與吳巢松抗手其札克
塔爾神道碑銘尤壯麗札本雜谷五屯熟番張氏父某
爲索諾木所殺故自弱冠投誠因祕獻入番捷徑阿文
成得以進兵成功金川平文成保奏來京隸滿洲旗授
侍衛川楚之役隨那文毅出征賜勇號尋交額經略調
派性敏捷每膺軍旅未嘗敗北軍中敬畏之呼曰苗張
無敢撻其鋒者洊至護軍統領在奏事處領班行走廚

子陳德乘 仁宗入宮時持刀直奔御轎前札奮身禽
賊獲陳德於神武門賞男爵仍兼恩騎尉丙寅隨德榜
奉赴寧陝勦賊首趨赴方柴關怒馬獨出手殺數賊賊
有識之者詫曰苗張至矣因皆奔潰楊時齋繼至爲之
撫慰賊皆棄甲請降出授科布多參贊大臣入爲漢軍
副都統兼武備院卿壬申四月卒賜金幣由驛歸葬麗
生碑文有云何羅之釁偶萌日禪之心已動侯遮扞衛
忠簡帝心京室密清罔有不韙指陳德一役也舒立人
二月二十日紀事云清塵敢犯屬車過百萬神靈一
剎那不是稔侯承賜姓東廂誰縛莽何羅亦謂苗張
烏程凌鳴喈泊齋壬戌進士官樞部會上疏極陳馬政

之弊請旨清理列具規條 睿廟特諭酌議施行因病
歸里其家在吳興盤溪之晟舍繪有歸釣圖盛子履爲
賦長歌云金門大隱青雲客胸貯賈生董生策解綬歸
來理釣竿紅拂珊瑚樹千尺盤溪之水清且幽田田蓮
葉波心浮杜陵草堂浣花里舍南舍北來羣鷗許身自
比稷與契豈爲尊鱸臥泉石補袞平生一片心付與青
山照明月盤溪溪口漁家船一簑秋雨一笠煙盤溪溪
畔漁家屋邁軸有人寤歌宿道場山色連何山山扉突
露青灣環碧雲迢迢天際望夢迴青瑣趨朝班吹簫樓
上仙人去挂瓢堂外斜陽樹多少漁磯垂釣人孤負湖

山最佳處先生身寄江湖中抱此磊落魁奇胸醉後高
歌出金石夜半鐙火光猶紅下泊齋杜門著述嘗訂太
白山人集及練溪詩文集也

嘉慶丁卯同安李西巖軍門勦蔡牽傷於礮遽卒封壯
烈伯諡忠毅嗣子廷鈺以襲伯充頭等侍衛出鎮南昌
廷鈺字潤堂能畫嘗自寫秋柯草堂圖吳子山詩丹青
不澆秋山色但寫修柯倚危石一鶴徘徊步夕陽仰天
清唳無人識芒鞋竹杖杳難尋脫葉蕭蕭風滿林誰憐
小李將軍畫偏有倪迂世外心其題忠毅自書詩後卽
用冊中原韻示潤堂云 聖恩感激海天深百戰威名

賊屢擒早見孫盧先破膽最難韓范得同心弓刀舊部
今飛將裘帶風流又羽林想見詩成橫槊後蒼龍扶艤
聽高吟書褒忠錄後云青驪老去依僧寺丹鳳人猶識
戰船丹鳳忠毅自製船名也

安南自阮光平得國後黎氏舊臣阮福映守農耐不下
儂耐者鹿耐也光平歲發兵攻之而福映收集遺眾日
強盛光平日削國日以耗遂招中國無賴爲盜各啗以
重爵以贍其軍光平死其國爲福映所滅大盜麥有金
卽奉其孫入海艘游弋粵閩洋面大爲瀕海之害飛艇
大者曰烏槽土盜船篷以紅爲飾彼時浙洋海寇鳳尾

水澳箬黃各幫與安南夷艇句結爲患首逆蔡牽爲最
阮文達督師勦捕發縱指示無失律首薦李忠毅次則
温州鎮胡振聲振聲閩人所乘戰艦以桐木爲之輕捷
異於他舟每出海常爲諸將先海寇望而畏嘉慶甲子
四月振聲以閩省例解軍工廠木植久不至自率偏師
往視之適蔡牽在臺灣鹿耳門劫掠戕官總督玉達齋
檄留堵禦以閩副將某爲之援不聽出令寇舟百餘艘
方匿竿塘洋約某會擊某怯而不進振聲奮勇領兵獨
往攻自未至酉戰數十合舟中二百餘人殲焉振聲負
重傷遂被戕害振聲之母賢每出獲寇則喜否則不令

入見故振聲屢殲寇卒以死勤事初奉檄知勢不敵致書文達言此行恐不得生還重洋閒隔若爲蜚語所中則聲名俱裂矣蓋死志素定且知逃罪者將誣之爲卮過地也事聞詔加封蔭一子陳雲伯次其事爲桐船行其後定海鎮羅江太逐寇出大洋月夜遇颶歿於海雲伯弔之有句云桐船更何處憑弔祇哀吟謂振聲也

宋芷灣讀李密傳二首云元感當年是覆車長安決策舊何如崎嶇大弟眞無謂草昧羣雄未易居旣不項王尊義帝寧堪張耳斬陳餘瓦岡諸將誰憐汝辛苦黎陽一老徐桃林谷口勢倉黃末路英雄亦可傷事業竟成

唐勝廣謠歌終應李逃亡入關躍馬原非易失仗騎牛
自不妨何至無人說遺事也曾有眼識秦王儼若史論
一則嘗言今人喜作詩余謂哭不能如老杜歌不能如
青蓮皆可不必作詩今人每不喜人作詩余謂東家女
子不能禁西家不哭其夫西家女子不能禁東家不喜
其子皆不必不作詩然則將何說之從曰祇要好而已
自是快論田山薑謂唐人絕句黃河遠上觀止矣少陵
避青蓮之工別闕一格學者所難芷灣云人皆議少陵
絕句爲短予以少陵自不肯爲人之所長若夫古今派
別焉可誣也杜自云法自儒家有心從弱歲疲或輒以

別調目之是可異已作二絕句云豈果開元天寶間文
章司命付梨園諸公自有旗亭見不愛田家老瓦盆滿
眼餘波爲綺麗少陵家法必風騷千秋尙有昌黎老流
出崑崙第二條

成都汪少海仲洋辛酉舉人大挑知縣歷宰桐廬山陰
海鹽錢塘道光庚子攝餘姚事英人犯順陷輒沙之洋
舟及黑白夷數十人少海盡禽之以和議成歸其俘爲
當路所稱詩如海鹽塘上云潮上猶疑戰鼓聲天風吹
淨戰雲橫孫恩死後艨艟散徐海歸來島嶼平父老能
歎晉時事蛟龍都避戚家兵投戈但議安瀾策卻要長

隄與水爭句如心窮造化天應忌氣太縱橫福可知官
如傳舍何妨攝政似文章只要真鄴下懷古云生逢亂
世稱周德死欲欺人署漢封均有英氣

瀏陽瞿吾山家鏊輓同年李榮齋詩云鵬鳥何來促宦
程一場短夢憾分明血殘蕭寺春衫碧腸斷山陽夜笛
聲有福死應增倍重此官生已抵淮清可憐墨吏貪殘
甚成就先生一大名恩怨鳩媒翻覆時同官叵測禍尤
奇宦無半載生同盡身有千秋死或知鶴弔已虛磨鏡
具松風長護墓門碑 天章卹典光泉壤豈獨微臣感
激思榮齋以戊辰進士試令江蘇淮北振災奉檄履勘

戶口憤山陽令王伸漢浮報將以實聞伸漢百計啗之不從乃唆其僕毒之以自縊聞喪歸夫人啟視衣有血痕其叔某奔赴都察院鳴冤上聞驗實下伸漢於理卹贈有加 仁宗御製詩立碑亭於墓道吾山其進士同年也

乾隆季年任城孫寄亭相國官廣西鹽法道著鹽法隅說意主課歸場竈聽商自爲交易謂所言者止於粵他處可以隅反如雲南四川之井鹽河東之池鹽皆可照辦惟淮浙長蘆則有根窩難行此法李少鶴爲之注謂前代如韓愈之駁張方叔蘇軾之駁章惇僅辨官鬻之

不便與河北不應更權李沆余靖盛度王隨時有調劑
然無如此法之簡切而可久者管子鹽筴之法但曰伐
芻薪煮海水爲鹽征而積之使糶之鄰封似當時尙無
私禁以齊一國所出之鹽而梁趙宋衛濮陽皆資以食
豈於諸國皆齊設官商而後通鹽禁起於漢至唐第五
琦皇甫鏞宋王安石章惇蔡京而用法益峻私販亦益
熾歷考禁私鬻之法初斬左趾後罪至死盜販者雖止
杖徒輒科同妻子遷五百里而犯者愈多明季私鹽駕
小舟多置篙楫沿江上下而強賈之卽不售輒爲椎劫
已跳身疾權瞬息相失官兵捕之不得當時識者謂如

唐末之王仙芝黃巢元末之張士誠皆鹽徒可爲深慮
費滋衝鹽徒行橫眉廣額何陸梁居人畏避客人強闖
穿柵破雞豕失鹽徒夜過中十場日持白梃夜刀鎗邏
卒往往遭殺傷草深地鹵龍池遁海澗江滿日月荒朝
廷禁止有明令何爲十百敢成行卽憫飢餓死溝壑積
成瘴臂反大創官府但習苟安計此輩蓄禍亦須防戡
而散之豈無術徒薪遠慮非更張不見高黃起鹽澤旬
日之間稱侯王若僅如漢之賢良文學引古義相爭使鹽與五
穀同價去商除課勢必不行轉令孔僅桑宏羊輩得以
藉口元魏時甄琛之言護鹽收利爲以父權子宜弛其
禁豈非仁人之用心然不爲國課計畫終屬難行故旋
罷旋復不免元魏輩目之爲迂唐建中時劉晏上鹽法
輕重之宜云但於出鹽之鄉因舊監爲置吏置亭戶收

鹽轉鬻於商任其所之初時鹽利四十萬緡者其後致
六百萬緡宋天聖中盛度等畫通商五利謂罷官自鬻
聽人入金錢京師權貨物而以江淮池鹽給之一歲中
已增課十五萬明鄧元錫之議謂商入餉卽給引赴場
聽竈戶驗引支發有官監糾其竈戶餘鹽聽商與平易
恣其所往鹽可通賣人無爭奪山陝射利之民不驅而
自歸人得量力中納而富商大賈莫由操利權莫利於
私售而私販之害絕大率立法簡易便民而無虧於課
煩難則民無所措手足商民俱困而征課亦難不徒鹽
法爲然也宋余靖言燕薊陷入契丹幾百年而民無南

顧心者契丹法簡易鹽麩皆賤科役不煩故也蘇軾云見兩浙民以鹽得罪者歲至萬七千人而奸莫能勝盜販者以兵仗護送率數百人爲輩吏民不敢近其得失可睹矣

費新橋方伯丙章爲文恪從子嘗手刻張文忠三事忠告官豫藩復爲楊靜閑比部刻籌濟編三十二卷麟見亭與富察詩橋尙書惠吉均有弁言靜閑常熟人家恬莊戊午讀書於乾麪胡同方伯長桂京寓西偏是年舉順天鄉試丁卯訪曾勉耘重至廳事有律句云竭來重訪讀書堂小閣依然雜誦忙籐架猶留前度碧槐花又

值此時黃一枚細檢巢痕在三宿重尋夢境長最是當年辛苦地宵鐙頻燂未能忘中州作宰著民功需次重來踏軟紅鴿羽共欣棲雁塔鳳毛早看翥蟾宮益儲循吏通經用依舊書生講藝同回首芸窗懷故字絳帷還喜坐春風籌濟編首載蠲恤功令蠲恤一門詳見會典戶部則例具列荒政大清律例有檢踏災傷條著在戶律繫以條例詩橋序謂是編所輯儲之於未荒之前步之於既荒之後所爲籌備經費者甚裕至於稽覈有程賑貸蠲緩有經要在大吏擇能而使牧令丞倅酌時地以制其宜亦通達治體之言也

嘉應吳石華訓導著有南漢紀南漢地理志端溪研史
工倚聲世比之嶺外之白石翁玉田生其荔村吟草亦
自絕俗有句云果熟漸聞禽語密荷深常覺雨聲多盧
敏肅摘爲楹帖其青樓曲序云廣靈城中有新吏來衣
冠客滿座縱酒談讌若平生權而故吏如退院僧門子
晝臥廡下無覺之者嗟夫今之對酒肉傾肝膽者非故
吏客耶是可傷也有故情不得終新歡安可長之句嗟
乎世之不名項籍者蓋亦鮮矣

乾隆丙戌翁覃溪在粵搜米元章詩刻不可得賦詩志
憾道光丙戌翁文端于榕根得之刻石紀事石華送翁

遂庵學使秩滿入都句云來尋米老熙甯石重和蘇齋

丙戌詩

南海顏君猷孝廉論嶺南國朝人詩絕句云交廣從來

是楚鄉湘纍苗裔擅詞章頑民不頌周家聖手掬寒泉

弔首陽獨漉山人字字真閒雲野鶴自由身篇終時露

傷心語慟哭西臺宋逸民領解才名三十秋租船詠史

劇風流朱查聯句雄壇坵得入承明盡白頭海日堂詩

自足傳不關推轂有諸賢一麾晚出南荒守日薄虞淵

亦可憐蝴蝶花開蝴蝶飛伍瑞隆僅傳音節竹枝遺王

邦畿子升陳喬生枉自稱詩老才盡漁洋感舊詩二家集除

選外亦少卓卓可傳者

才力焉能繼數公災梨禍棗古今同自箋

詩語吳山帶不滿他人一笑中七子聯翩應制科生才

方訝此時多聊將鴻博誇時藝奈爾車

騰芳曹憤

數子何

蘇珥羅天

高足惠門中理學胡方語稍工最負時名何

刺史

西池憐他都是應聲蟲詩道榛蕪數十年月泉吟社

誤時賢惡詩多少人傳誦絕倒黃同石一編

所著戰古堂集類多

尖巧小題初出

百年應是中興時重見馮生正始追

錢

石云嶺南詩自曲江後皆存

偏方之音惟馮生力追正始手寫長篇鐫五岳一時傳

遍六州兒

魚山改官客

米店雜題亦擅場

檀萃云當時

命題者其警句云

爾時派類如此 家家社飲鬪篇章起衰若問推陳涉

一卷新詩仿盛唐胡亦常崛起西蠻自得師二樵三絕畫

書詩開篇學杜西歸作便是唐臨晉帖時於物多藏仍

是累與人同患得無情張葑房整理雅人深致和平語

不枉才高四傑名李南礪有張仙吏人推李載園符清名

流海內縞荆存朝吟暮刻安陽令趙渭川常以不及梅

州葉解元葉石亭鈞三撥開雞屋稱前世浸過瓜棚勝

舊年呂石帆詠野逸阿堅原本色好攀楊朴共隨肩評

論極有分寸無鄉曲之見存也嘉應李秋田光照嘗闢

海聲堂祀曲江以後下至二樵二十六人朔望必具衣

冠拜之温氏輯詩海延秋田襄助編訂黃石溪復輯粵

詩蒐逸以補之石溪名子高性嗜書尤重鄉邦文獻嘗
贈書賈趙翁截句云一生心事向殘編鬢髮消疏不計
年見說乾隆禁書日親投甘結到官前所撰南海對譚
玉生比之汪容甫

宜黃洪介亭翰編占銓有小容齋詩草楊兼山閣部祠
云蜀中名士憐諸葛宋室孤臣念愍孫中秋雨夕飲小
石山房云故人偶聚常中酒佳節相逢每憶家皆極和
雅其鸚鵡洲云嗟彼駮鼠爾乃發于鈞弩鹵莽以殺身
於世究何補意亦正大

吳竹橋以王藝齋與孫子瀟並稱子瀟乙丑入翰林藝

齋己已成進士皆出蔡生甫之門藝齋入詞館後從法
梧門討論典實爲校同館詩賦鈔而益其未備在諫垣
論蘇松加米十不可一疏爲時所稱不獨律賦試帖擅
場也

李申者極推重完白山人嘗從容問曰嶧山碑雖出徐
騎省然其氣古穆當勝少温山人曰是必本李相之舊
固非少温所及曰然則君書當勝少温山人蹙然曰是
烏能少温功力臻至其圓到處卓然不可及結體小變
正是其胸中神化也無論少温卽唐人碑額篆隸亦各
具天趣後人不能追矣因問唐宋以來諸能書家山人

曰唐之書人大抵兼工隸法故往往其人不以書名而書曰勝人唐以後隸學衰絕而能書之家未有不暗合隸法者所謂用筆千古不易也申者既錄其遺詩復附著其尊人木齋先生一枝詩二首云曉起猶殘月柴扉破霧開呼童掃花徑夢有故人來一向迷幽徑因之問耦耕祇言山隴裏聽得有書聲山人與從子書有曰讀書須極熟然後得尺則尺得寸則寸久之自不能舍我少時何嘗讀書年十三四心竊竊喜書年二十祖父攜至壽州便已能訓蒙今垂老矣江湖游食人不以不識字相待暫能讀書獲益如此汝輩可不及時自勉哉父

母不足恃家業不足恃自己氣力不足恃可恃者讀書
明理存忠厚心而已語語平實初無游士放言之習
毘陵毛燧傳洋溟畢訓咸莘農皆祖侍郎之望客洋溟
古意云盧女堂前秋夜長烏啼門外落微霜舊時宮觀
通鴛鵲近日樓臺引鳳凰小院清機傳織素瑣窗明月
照流黃佳人何事輕游俠尙醉邯鄲錦瑟旁莘農金陵
云無數青山東北行歸帆遙指石頭城一江吳楚寒潮
合六代園陵夕照橫燕子磯前仍繫舫烏衣巷口話歸
程劇憐春色隨風徧幾樹梅花郭外橫詩皆可誦洋溟
尤善古文詞趙收庵稱其出入唐宋于近代似歸熙甫

能面斥人過祖侍郎爲湖北布政遭父憂以軍興不得
請洋溟于坐面責之侍郎媿謝周星頡傷逝篇云獨往
孤清味蓼生天涯尊酒爲心傾韓樊傑構人難識黃老
元言理最明餽口一經原落拓撐腸萬卷漫縱橫重經
漢上題襟處愴絕西風過雁情味蓼軒洋溟集名也

陳雲伯碧霞元君祠詩金碧晃桂棟雲霞絕蘭楣玉殿
青山顛云是元君祠簷牙紅靺鞨屋脊青琉璃飛鳳翼
鐵瓦潛螭夾銅碑三成峙綽楔金闕輝明曦寶庫梨棗
錢橐鑰嚴金鏡中殿鏤花檉畫壁紛葳蕤花幡颺流蘇
珠龕麗罍思層臺列寶鼎禾旌映翠旗仙像皎如玉瑜

翟九鳳飛海鏡鑿玉容天月窺修眉瓊印碧宇照石磬
瑤壇遲羽衛擁雲嬪一一天人姿仙凡隔咫尺蔽以青
霞帷載考元君號典籍多異詞稽之瑤池編云始黃帝
時崑崙有真人西向迎蕃釐玉女六七輩雲冠而羽衣
一人得升僊靈綬揚翠襪或云天帝孫織女應同支厥
父名金虹太乙羣仙師或云名玉葉國在天西涯女金
夫氏石姓字皆可稽曾入天空山修真黃華峭得道西
漢年碧落乘風歸南海有天后靈蹟湄州湄或云二而
一玉冊同致辭靈談半幽渺莫辨是與非玉女出岱宗
說本秦李斯翠微事元君亦見隨州詩石像易刻玉祥

符延洪禧文字雖有徵猶未鑿管窺恭讀 純皇記典
重邁鼎彝其義同富媪其尊竝皇嬭其功翊乾緯其職
秉坤維其神卽后土其實則地祇其禮卽方望其位則
壇壝延洪闡經訓一破千禩疑祠門正南向四覽心神
怡東憑五花厓盤道臨屨巖西北望嶽頂磨厓勢邈迤
萬峰拱靈域蒼翠羅階墀下視見城郭界畫如置棋金
鐙中夜照香樹三霄垂翠華記 東巡 賜額生光輝
金絲韻流鈴天仗森威儀九州萬士女禮拜瞻洪慈祠
宇徧海岱靈貺昭明徽惟此實上廟天門緯參差神漢
溯璇源西向尋瑤池此登岱時作也可見香火之盛京

師髻髻妙峰皆西山別出其上皆有碧霞元君廟 朝
廷歲以四月朔命內廷上公一人進香髻髻山而都畿
士女皆賽妙峰山其高峻倍於髻髻所至成市俗稱娘
娘頂開至二十八日封山李越縵詩千尋髻髻出雲間
黃輦年年輟內班翠磴不知青蓋貴都人爭賽妙峰山
熱河卽水經武列水漢書濡水卽今之灤河磬鍾峰卽
水經注所稱石挺伊遜河華言九曲也卽水經索頭水
舊作伊松亦作衣素宜孫儀粟俗名羊腸河河水輕重
與金山中冷泉京師玉泉相等有鱸魚味甚美陳雲伯
武列水詩江源非岷山河源豈積石崑崙南北流糾謬

訂載籍兩戒尙如此稔此枝水百武列紀水經分合誤
荒僻三藏東西中載筆未親歷龍泉與龍芻通塞疑莫
釋東南厯石挺倒影夕陽赤本朝一中外無復門閼隔
肄武重秋獮圍場木蘭闡避暑建仙莊大川抱絡繹念
茲沿誤久幾暇精考覈名王與內臣奉 詔走沙磧仙
槎乘張簫虎符佩都實始知紀載譌目擊勝耳食西山
陀羅海察罕字可譯中出玳瑁溝默沁有遺蹟東出三
道溝賽音達承德自匯溫泉温始名熱河熱南流入灤
河歸海達潮汐煌煌 御筆記 天章析地脈更擬訂
濡源御圖備方策時阮文達自浙撫入覲山莊雲伯從

行作也其十五善射詩長楸玉墀聲瓏瓏細纈龍文韜
寶弓一聲明月裂金鏃百步隨聲下花鶻薰羅袴褶花
盤雲萬人壓場看冠軍中使傳宣尙方賜雀尾搖搖麗
金翠亦資談故

孫文靖家孫古雲娶查映山都諫瑩女瑩爲聲山詹事
孫家析津豪俠侈結納所謂查三標子者也郭頻伽爲
古雲夫人志墓謂給事惟生一女館甥之夕賓從雍容
音樂繁會彩楣蘭室珠輝玉光見者以爲嵩岳嫁女不
是過當時名士爲文乃如此陳雲伯詩亦不免此病然
如方靈皋記姜西溟遺言謂徐司寇子某作樓成飲吾

以落之曰家君云名此必海內第一流故以屬先生吾
笑曰是東鄉可名東樓云云健庵聞而憾焉西溟自言
司寇平生故人與爲兄弟稱此言輕薄西溟不宜出諸
口靈皋不宜筆諸書是直翹朋友之過矣非有德能文
者所宜爲也

太倉沙溪鎮介直塘塗松之間鎮人張賦京輯其詩爲
沙溪詩存中如吳孚中句云江邊細草秋仍綠樹杪寒
煙溼不飛林洪道句云別久話長甯惜醉夜深坐密不
知寒不無可采

陽湖莊傳永太學會儀少孤事母至孝謹性倜儻不屑

不潔尤篤于友朋爲詩多古法從族祖述祖游默而好
深湛之思與張皋文善皋文歿追論問答之語爲書一
篇又嘗報其族叔綬甲書論爲學之要自事親從兄始
其說甚美卒年三十九有養直居詩四卷寄皋文云朱
絃辭綠桐何用發清商玉貌遠金鑑誰與視新妝喃喃
梁間燕出入同翱翔如何蕙蘭花并根殊芬芳浮雲隨
飄風倏忽不可常仰瞻經天日猶得共流光灼灼桃李
姿美好不能言徘徊芳樹下令我傷心魂榮落春風中
但看枝葉蕃令辰難可再芳菲亦已闌威鳳棲高岡竹
實詎可飽山雞舞明鏡顧盼羽毛好願爲雙黃鵠比翼

游物表寄言尉羅者意不在梁稻璠瑜孕石中精神見
山川甯勿自珍閱積厚使之然良工善磨治彫鏤珣與
琯卻走不一顧天質誠亦全棄捐矢弗告何以盡君歡
丁若士吳山子爲之傳皆惜其無環堵之室以樂其中
就其志未及有所譔著鬱鬱不聊以死也

錢塘李芝謹墀弱冠學詩日暮遠眺得霞光不滿湖句
游雲居寺得荒亭懸落日古佛倚寒山句杭董浦謂嶺
雲上人曰我輩又見一代詩人矣居淺山下以淺山園
名集仇一鷗以七絕詠同里詩人謹墀詠以五絕題曰
錦里橐其記釋笑魯句云一鑑千古夢萬壑老僧寮其

